



FONO AOAQ FAITULAFONO

**Lipoti a le Komiti o Mataupu Tau Aoga,
Saienisi, Faamatalaga Tekonolosi**

i le

P.P. 2015/2016 Nu. 39

**Faamatalaga o Naunautaiga o Auaunaga
2014 – 2017, a le Faalapotopotoga o
Suesuega Faasaienisi a Samoa.**

Tuina atu i le Fono Aoaq Faitulafono

Ua fautuaina e le Komiti o Mataupu tau Aoga, Saienisi, Fesootaiga ma Famatalaga Tekonolosi le Fono Aoa ina ia faautagia lana lipoti.

1. IUGAFONO:

I le maea ai o iloiloga a le Komiti, na faaiugafonoina ai e fautuaina le Fono Aoa ina ia faamaonia,

- **P.P. 2015/2016 Nu. 39, Faamatalaga i Naunautaiga o Auaunaga 2014 – 2017 a le Faalapotopotoga o Suesuega Faasaienisi a Samoa; faatasi ai ma**
- **Fautuaga a le Komiti ua tuuina atu.**

2. FAUTUAGA:

I le maea ai o ana iloiloga, e fautuaina ai e le Komiti le Malo ina ia;

- 1. Silasila i le sailia ma le faamautuina o ni tagata e teu faafaigaluegaina a latou tupe o lo o iai le naunautaiga i le galueaina faapisinisi o oloa fou ua mafai ona faamaonia i iuga o suesuega faasaienisi a le faalapotopotoga i totonu o le atunuu.**
- 2. Faalauteleina le tulaga o atinae ma faataunuu suesuega faasaienisi ma suesuega faapitoa i luga o oloa gaosia ma auaunaga i totonu o le atunuu, aua le tautuaina o le maketi i le lotoifale aemaise maketi i atunuu i fafo.**
- 3. Silasila i le faalautele atu o suesuega a le faalapotopotoga i oloa auina mai fafo mo faamai e ono maua mai ai aua le saogalemu ma le soifua maloloina o le mamalu o le atunuu.**
- 4. Fautuaina le faalapotopotoga ina ia vave faatino ana poloketi o lo o taua i lalo o le Vaega o ana Poloketi Faavae Tetele, ona e taua tele mo le tuuina atu o le fesoasoani atoatoa mo le lelei faatino o ana galuega, ma ausia ai ana Naunautaiga o Auaunaga.**

3. SAILILIGA:

3.1 Galuega Tuufaasolo:

1. Vaaiga Tulai:

“E ala mai i suesuega ma le Atinae o Tau Aoga e faaopopo atu i oloa ma galuega faatino, o se tulaga alualu i luma taua lea i le Tamaoiga o le Atunuu (GDP) ma ia ausia faamanuiaga i le soifuaga lautele o tagata Samoa”.

2. Manulauti:

“Ua faamoemoe le Faalapotopotoga o Suesuega Faasaienisi a Samoa ia faia ni suesuega faasaienisi ma atiae faiga faatekonolosi faatasi ai ma taunuuga e tele so latou taua i le atinae ma le gafataulimaina o oloa ma galuega faatino mo oloa e auina atu i fafo, ma ia ausia faaitiitiga i oloa tau suauu e faaulufale mai ma le puaina mai o kasa vevela lé foia”.

Naunautaiga o Auaunaga / Sini Autu:

1. Ia faalauiloa le tamaoiga o Samoa e ala atu i suesuega ma atinae.
2. Faatino suesuega faasaienisi ma suesuega faigata e manaomia ai le poto faapitoa, ma le naunautaiga e sitia le tulaga aoga I punaoa ma auaunaga o lo o maua ma faatino I totonu o le atunuu.
3. Faaaoga suesuega faasaienisi ma suesuega faigata e manaomia ai le poto faapitoa e atiae ai oloa ma gaioioiga faataitai e I ai aoga mo feafaatauaiga I maketi I totonu o le atunuu ma fafo.
4. Ia faamausali faiga faapaaga ma faalapotopotoga tutoatasi ma ia naunau i feafaatauaiga e lagolago ai galuega fai a le faalapotopotoga.
5. Ia mautinoa le aoga tatau o aoga mo tagata suesue ma le faatinoga o suesuega faigata e manaomia ai le poto faapitoa.
6. Faatele ma ia pulea lelei le faafoega o tupe ma tagata faigaluega a le faalapotopotoga.

4. AOTELEGA

a. O Vaega na matauina e le Komiti:

Na maitauina e le Komiti i lana iloiloga le lelei faagasolo pea o galuega a le faalapotopotoga, e ala i le siisii malie pea i luga o le tulaga I ana suesuega ini oloa o

lo o faataitai ona gaosia, o le siitia i le tulaga maualuga e mafai ai ona faatino ana galuega, aemaise le alualu foi i luma o le galulue faatasi ma paaga manaomia, ma le faatuputupulaia o le lelei o le faalapotopotoga ma lona va ma ana paaga. Na maitauina e le Komiti le tele o Naunautaiga o Auaunaga o lo o faailoa mai i le Faamatalaga i Naunautaiga o Auaunaga 2014 – 2017, o lo o faapea ona lelei faagasolo ma faaauau mai pea lona faatinoina mai le tusi o Faamatalaga o Naunautaiga o Auaunaga 2012 – 2015. E leai se suiga tele i ana Naunautaiga o Auaunaga ona o lo o faaauau mai lava lona faatinoga, seia vagana lona toe faapuina lea o lo o i ai nai suiga laiti ina ia talafeagai ma taiala ma ana galuega o faatino nei.

Na auiliili ma maea fuafua tatau lelei mai e le faalapotopotoga ana Naunautaiga o Auaunaga, ma faataatitia lelei mai taiala ina ia mafai ona ausia le faatinoina lelei o ana galuega. Na matauina auala o lo o ave i ai le faamuamua a le faalapotopotoga e ausia ai ana Naunautaiga o Auaunaga. O le taumafai pea lea o le faalapotopotoga e siitia le tulaga maualuga o le faatinoina o ana auaunaga i suesuega faigata e manaomia ai le poto faapitoa, e ala i le faaleleia o vaega uma mo le faatinoina o suesuega faapitoa ua mautu ma faamaonia i tulaga aloaia faavaomalo. O suesuega faapitoa e manaomia tele mo le tali atu i manaoga mo le mafai lea e oloa gaosi i lo tatou atunuu, ona ausia le tulaga aloaia ma le lelei atoatoa o lo o manaomia mo oloa, ina ia mafai ona ausia ai taiala ua faataatitia mai mo le tulaga aloaia o oloa i atunuu i fafo. E faapea ai foi le mafai ona ofi atu o a tatou oloa i maketi i fafo, pe a ausia aiaiga faapitoa ua faataatitia mai e atunuu i fafo mo le tulaga aloaia lelei o oloa e auina atu. Ua matauina foi le taumafai o le faalapotopotoga ina ia siitia le tomai ma le poto faapitoa o lana aufaigaluega, e ala i le faia o ni faiga faapaaga ma Iunivesite i fafo. E pei ona iai le malilie ma le Iunivesite o Vitoria i Ueligitone Niu Sila i le tausaga 2012, lea ua mafai ona auina atu ai nisi o le au faigaluega e toalua, mo le faia o le PhD a le isi a o le Postgraduate Diploma a le isi i le tausaga 2013 ma le 2014.

Na maitauina e le Komiti e tauala mai i molimau le tele o poloketi faaauau e pei ona taua i lalo ifo, o lo o maitauina foi le faagasologa lelei ma siisii pea i luga o le tulaga I le faatinoga o nei poloketi aemaise ai le ausia ai e nisi o poloketi o ana fuafuaga na faataatitia.

- ***Paiofano ma Paioefanolo (biofuel)***

O lo o faagasolo pea suesuega i le faaogaina o le suauu e maua mai i le pafiki, o se isi auala e faaogaina mo le gaosiina o le paiofano. A maea lea suesuega ona tuuina mai lea o se lipoti aua se fuafuaga faataatitia mo le faapisinisiina o lea poloketi. Ua maea faatino polokalame faalauiloa ma le maketiina o le paiofano e gaosi mai le suauu popo mo le atunuu lautele, peitai

o le taimi nei o lo o tau saili pea le faalapotopotoga mo se kamupani po o se tasi e mafai ona faapisinisiina lea poloketi. Sa iai le fuafuaga e faapea ona tuuina i le Faalapotopotoga o Esetete Tausi a Samoa (STEC) latou te faapisinisiina lea poloketi, ae fesoasoani atu le faalapotopotoga e ala i se talosaga na tuu faatasi i lalo o le Faalapotopotoga o Suesuega Faasaienisi a Samoa /Faalapotopotoga o Esetete Tausi a Samoa / Matagaluega Siosiomaga ma Punaoa Faanatura mo se nonogatupe, lea na talia e le ARENA ia Ianuari 2014 se nonogatupe e tusa ma le \$7 miliona Amerika, peitai na toe faamamulu le Faalapotopotoga o Esetete Tausi, ona o la latou vaai latou te le gafatia aiaiga na tuuina mai mo le totogiina atu o lea nonogatupe.

- ***Gaosiina o le Suauu Avoka & Pata Avoka***

O le suauu avoka na gaosi ina ia mafai ona faatau i totonu o le atunuu faapea maketi i fafo. Sa iai se tasi na faaalua lona manao i lona faapisinisiina o le gaosiina o le suauu avoka, peitai na toe faapafala lea maliliega ona o se tulaga faaletonu i le seleni a lea faapisinisi. O lea ua toe tatala atu le avanoa i so o se tasi mo le tuuina mai o ni tauofoga mo le faatauina o le masini gaosi aemaise le faapisinisiina o le gaosiina o le suauu avoka. O le gaosia mai ai o le suauu mo le kukaina o meaai mai le avoka, ua maua ai ma se isi metotia, mo le taumafai lea o suesuega e gaosi mai se pata avoka mai le suauu avoka.

- ***Auaunaga o Suesuega Tatau ma Auaunaga Tauloa Faavaomalo ma le Potu Suesue mo Nakoti po o Vailaau ma Fualaa faasaina .***

E maitauina le taumafai pea o le Faalapotopotoga e faaauau le siitia pea o le tulaga maualuga o suesuega faapitoa mo oloa gaosi ia ausia tulaga aloaia, ia latou faatinoga i totonu o potu suesue. O le vaega lea o suesuega ua faapea ona vavae ese ina ia ave i ai le faataua i la latou galuega, ina ia mafai ona ausia e a latou suesuega le tulaga aloaia mo oloa gaosi ma auaunaga i le va i fafo. O lo o taumafai pea le faalapotopotoga ina ia siitia le tulaga maualuga o le vaega lea, ina ia mafai ona tali atu i manaoga a a latou paaga, mo le tuuina atu o le auaunaga faapitoa o lo o latou manaomia, mo le suesueina o a latou oloa ina ia mafai ona aloaia i Samoa nei aemaise lava le auina atu o nei oloa i atunuu i fafo. O le vaai mamao lava a le faalapotopotoga i lenei fale suesue, ina ia aua nei gata i oloa suesuega a ia oo atu i nisi auaunaga. Na molimau le Faalapotopotoga, o le tausaga 2013 na faalautele ai a latou suesuega e ala i le faatuina o Potu suesue mo nakoti po o vailaau ma fualaa faasaina, e faaopopo i auaunaga o lo o tuuina atu e le vaega faapitoa lenei o le faalapotopotoga mo suesuega faigata e manaomia ai le poto faapitoa. O le autu atoa o le faaopopo ai o lenei fale suesue, o le mafai lea ona suesue ai vailaau ma fualaa faasaina, ina ia mafai ona tuuina atu ai se molimau i le faasimasinoga o lo o manaomia

lea auaunaga mo a latou mataupu o lo o faamasinoina. . O le faatino ai o le tulafono o nakoti, lea ua faaopopo ai i le amataga o le 2014 a latou suesuega i le suesueina o nakoti po o vailaau ma fualaau faasaina i le maruana. O lea foi ua galulue faapaaga le faalapotopotoga ma le Matagaluega o Leoleo, Ofisa o le Loia Sili ma le Matagaluega o Faamasinoga, ina ia mafai ona tuuina atu le auaunaga a le faalapotopotoga, e ala i le faatinoina o suesuega i nakoti po o vailaau ma fualaau faasaina mo faamasinoga. O le amataga o le tausaga nei lea ua faalautele atu ai suesuega o le tulafono o le nakoti i le aisa.

- ***Falaoamata gaosi mai le Ulu***

Ua maea ona faatinoina e le faalapotopotoga suesuega mo le gaosia o le falaoamata mai le ulu. O le taimi nei lea ua galulue faapaaga le faalapotopotoga ma le SAME, e ala i le lagolago atu a le faalapotopotoga i le SAME mo le talosaga o lo o tuuina atu i le Iunivesite o Hawaii, e ala i le fesoasoani mai a le Iunivesite i le SAME mo le faapisinisina o le gaosiga o le falaoamata.

- ***Poloketi o le Faamamaina o le Suauu Popo***

O le sini autu o lenei poloketi o le toe faamamaina lea o le suauu popo kuka meaa i e ala i le faaaogaina o nisi o punaoa o lo o maua i lo tatou atunuu mo le faamamaina, ia mafai ona aveesea pe faaititia le malosi o le manogi o le suauu lea o lo o mumusu ai le tele o nisi o tagata mo le faaaogaina i le kukaina o meaa.

- ***Faaaogaina o Tekonolosi mo suesuega i fua o faaeleeleaga.***

Ua maea faataatia mai e le faalapotopotoga ana taiala mo le faaaogaina o tekonolosi mo fua o faaeleeleaga, po o le faatinoina lea o ana suesuega ini fua o faaeleeleaga se lua ina ia mafai ai ona siitia i se isi tulaga maua fua o faatoaga a le atunuu mo lona auina atu i atunuu i fafo. Ua maea suesuega a le faalapotopotoga i le taumafai lea e faaaisa le talo mata o se isi auala e mafai ona auina atu ai i maketi i Ausetalia ma Niu Sila, nai lo le tulaga masani o auina atu ai le talo, ona ua tele ina saisaitia le auina o le talo mata a Samoa i maketi tetele ia ona o le tele o a latou tulafono mo le puipuiga o atunuu mo ni faamai e faaulufale atu i o latou atunuu ona o ni oloa. O lo o saili foi le faalapotopotoga pe ao ina auina atu i fafo o talo mata faaaisa i pepa iila e mafai ona iloa atu lava talo o taatitia mai, po o le saili foi i le ave i tagapepa lea e maketi ai i tagata faatau (packaging), o lona uiga e manaomia foi le masini lea e faa'ea ai tagapepa mo le tuuina ai o talo mata mo le faatauina atu. O le taimi nei o lea ua auina atu i Niu Sila le uta muamua o talo mata faaaisa

mo se faataitaiga muamua i le maketi. O lo ua faagasolo foi i le taimi nei suesuega i le ulu ina ia mafai ona ave mata faaaisa e pei o le talo.

b. Poloketi o lo o Fuafua

O lo o faataoto mai i Faamatalaga i Naunautauga o Auaunaga ni poloketi faapitoa o le a lagolagosua i faiga faavae a le malo o Samoa.

- ***Fale Suesue Fou***

O lo o manaomia e le faalapotopotoga le fausia o se fale suesue tutotonu. O le taimi nei e tolu fale suesue eseese o lo o faatino mai ai suesuega e manaomia ai le poto faapitoa, peitai e tele le avanoa e ono tupu ai se faafitauli i le aumai i fafo o suesuega mai i le isi fale suesue i le isi fale suesue mo le faaauau ai o suesuega manaomia. O le mafuaaga lea e manaomia ai se fale tele mo suesuega tutotonu a le faalapotopotoga ina ia mafai ona faatino uma ai suesuega, ma faamaea uma ai i totonu o le fale lea e tasi e aunoa ma le felauai mai i le isi fale suesue i le isi fale suesue, aemaise lava suesuega faigata e manaomia ai le poto faapitoa mo le aloaia ai o tatou oloa gaosi i le va i fafo. O le faia foi o se fale tutotonu o le a mafai ai loa ona maua le avanoa o fale tuai nei e faaaogaina mo nisi poloketi o manaomia lona faatinoina a le faalapotopotoga.

- ***Fausia se Pa Puipui e siomia ai le Lotoa***

O lo o ua galulue nei le faalapotopotoga mo le faamautuina o se vaega tupe mo le fausia o se pa puipui mo le lotoa. Ua faatopetope foi gaioiga a le faalapotopotoga ina ia fausia lea pa ona o lea ua i ai le fale suesue mo nakoti po o vailaau ma fualaau fasaina. O lea foi ua i ai mea pueata i totonu o nei fale ona o le puipuiga lava o nei suesuega, a o lea ua ave i ai le faamuamua a le faalapotopotoga ona o tulaga o le puipuiga o nei suesuega.

- ***Faatauina Taavale mo le Faalapotopotoga***

O lo ua iai le fuafuaga mo le faatauina o se isi pikiapu fou e fesoasoani i galuega faatino a vaega e 4 a le faalapotopotoga, o lo o latou faaoga faatasi le taavale e tasi i le taimi nei, ona na o le 3 taavale a le faalapotopotoga. O lo o faaaogaina le *van* e le Vaega mo Auaunaga Lautele mo a latou galuega faaofisa i aso taitasi, ma le isi pikiapu o lo o faaaogaina e le Ofisa Sili o Pulega. E le o fuafua le faalapotopotoga e talosaga i le malo i se tupe mai le paketi mo le faatauina o le ataavale, ae o lo o tilotilo le faapotopotoga i ana tupe sefe pe totoe mai e le i faaaogaina i nisi o ana poloketi o lo o faatinoina i le taimi nei. O lo o iai foi le fuafuaga ina ia sui le van tuai o iai i le taimi nei i le faatau mai o se isi van fou. E manatu le faalapotopotoga o le a fesoasoani

lea i le tele o le tupe o lo o faaaluina mo le tele o vaega fia faalelei o le van tuai o lo o faaogaina nei.

Na maitauina le iai lea o ni poloketi fuafua mo tausaga 2014 – 2017 mo le ausia ai o Naunautaiga o Auaunaga a le faalapotopotoga.

- ***Faapalaga o le Koko***

O lo o vaavaai i le koko mo le tele o maketi eseese, po o oloa e i ai nisi ona lelei faaopopo pe a faapalaina, o le a tulituliloa foi e lenei suesuega le mafai lea ona faavasegaina ituaiga koko eseese pe a faapala, ma maitauina foi se faapalaga e pito i sili ona lelei e mafai ona maua ai se isi faaopopoga lelei i le koko nai lo le koko i lona tulaga masani.

- ***Falaomata e gaosi mai le Popo***

O le maea ai ma manuia le suesuega sa faia mo le gaosia mai o se falaoamata e lelei mo le soifua maloloina (gluten free flour) mai le ulu ma le manioka, lea ua fuafua ai e toe faia ai le isi poloketi e faaoga ai lava le suesuega lea, o le taumafai lea e gaosia mai le falaomata i le aano o le popo, lea e faaogaina na o le suā popo i le gaosiaina o le suauu popo.

- ***Faafaileleina o Oketi eseese ma le gaosiaina o U’u manogi mai Fua o Laau.***

O lenei poloketi o le a faapitoa lona autu i le faafaileleina o ituaiga oketi eseese, ae faapea foi le taumafai i le gaosiaina o ni u’u manogi mai fua o laau o lo o maua gofie ma taatele i laufanua o Samoa.

E lua ni taiala na faaopopo i le Naunautaiga o Auaunaga muamua i le Faamatalaga o Naunautaiga o Auanaga, e faaopopo ai i le atinae o le tamaoaiga i Samoa e ala i le sitia o le tulaga o Suesuega Faapitoa ma atinae.

- ***Suesuega i meaai mo manu.***

O le poloketi lenei o lo o tilotilo i le faia o suesuega i le gaosia o meaai a manu e faaoga ai punaoa o lo o maua ma tele i totonu o Samoa. O lenei poloketi o le a fesoasoani tele i faifaatoaga ma fai lafumanu a le atunuu e ala i le gaosia o meaai a manu mo lafu puua ia pa moa. E mafai ona suesue e le faalapotopotoga punaoa uma e mafai ona maua i le atunuu, e fesoasoani e sui ai meaai o gaosia ai nei meaai a manu, ina ia mafai ona paleni ma lelei aoatoga pe a maea ona gaosia.

- ***Fausia o se Fale laititi e gaosia ai apaia.***

O lo o tilotilo le faalapotopotoga po o I ai se auala e mafai ai ona fausia se fale ia laititi. O lea fuafuaga o lo o faavae mai i le fuafuaga mo le fausia o le

kamupani a le Bombobee i Samoa. O le fuafuaga o le Bombobee o se kamupani latou te faatinoina na o le aveesea o vaega taua o ia latou te manaomia, e pei o le apakoa ma le masiamsi pe a taunuu le maliega mo lea kamupani o lo o faapea ona faagasolo faatalatalanoaga. O vaa tetele ia o le a latou fagotaina ma auina mai i totonu ia o lo o manaomia e le kamupani a le Bombobee, o le a faapea ona latou aumaia ai ma le tele o isi ia e pei o le atu, ae le faaaogaina e le Bombobee. O i la lea e faavae mai ai le fuafuaga mamao lea a le faalapotopotoga mo le fausia ai o se faleia laititi I autafaane o le kamupani a le Bombobee, e faaoga ai le tele o ia nei o le a maua mai e vaa fagota nei ae le faaaogaina e le kamupani e gaosi ai ni apa ia. O le fuafuaga a le faalapotopotoga ua na o sa latou ata faataoto mai pe mata o se tulaga e mafai ona fai I le faatinoina po o le gaosia o se apa ia, ae o le tulaga i le faapisinisiina pe mata e lelei pe gau i lona tulaga faapisinisi, e le oo la i ai le tomai o le faalapotopotoga o la latou matafaioi o le vaai faasaienisi i nei fuafuaaga. O lenei fuafuaga ua na o se ata faataatia mai a le faalapotopotoga pe a manuia faatalatalanoaga ma le Bomobee ma le malo, ae o se avanoa foi mo nisi avanoa faigaluega mo tagata o le atunuu.

5. FAAFETAI:

E faailoa le faafetai a le Komiti I le Komiti Faafoe ma le Pulega a le Faalapotopotoga o Suesuega Faasaienisi a Samoa mo la latou tautua faifai pea mo le atunuu, aemaise lava a latou taumafaiga ina ia mafai ona atinae ni auunaga fou ma le gaosia o ni oloa e faapea ona faamanuiaina ai kamupani I totonu o Samoa, matagaluega eseese a le malo, so o se faalapotopotoga o lo o tautua I le atunuu I soo se auunaga faapea ai ma le atunuu lautele, ma siitia ai le tamaoiga o le atunuu. E faafetaia foi e le Komiti le Pulega mo le avanoa na iloiloaina ai e le Komiti la latou Faamatalaga I Nauanautaiga o Auaunaga 2014 – 2017.

6. MOLIMAU

I le faagasolo ai o iloiloga a le Komiti, sa mafai ona maua le avanoa e faatalanoa ma tuuina mai ai i le Komiti nisi o faamatalaga a nisi o molimau o lo o taua i lalo ifo;

Faalapotopotoga Suesuega Faasaienisi a Samoa

- | | | | |
|----|-----------------------|---|---------------------|
| a. | Tilafono David Hunter | - | Ofisa Sili o Pulega |
| b. | Pousui Fiamé Leo | - | Ofisa Sili Lagolago |

7. **SAINIA E SUI O LE KOMITI.**

Tofa LENATAI Victor Faafoi Tamapua
TAITAIFONO.

Susuga IFOPO Matia Filisi
SUI TAITAIFONO

Tofa AVEAU Tuala Lepale Niko Palamo
SUI USUFONO

Tofa TUSA Misi Tupuola
SUI USUFONO.

Tofa LEVAOPOLO Talatonu
SUI USUFONO.

Afioga TUFUGA Gafualeata Faitua
SUI USUFONO.

Tofa TUILEUTU Alavaa Voi
SUI USUFONO.